

rituka kaniarumi mataa taamcuru

'esi na uacani mapunarū tantanau. 'una 'inia karananana marūkurapū.
sikara in, 'una ucani taamcuru. ma'icupū cucumeni marūkurapū 'inia. vanai
sii paira nguain matisa'ū ti'ingai marūkurapū kumūnū. miaranau cu
taamcuru pacupūngū tia kumakūnū 'aramū kaniarumi. ma'incu sua
kaniarumi, sii 'una nguain makūkuang kava. noo aracapiciin taamcuru ia,
aratūkupū sua kaniarumi makai cu mari. 'inmaamia cu makūkuang kava na
pipiningi. 'esi 'inia sua taamcuru, ka'anū tavara'ū tia pakūnnanu.

na tantanau iisua. sua kaniarumi mataa rituka ia, katangria
nguani. 'akia rituka makai kaniarumi makūkuang kava. iimua 'inmaamia cu
kipatusū arapana'ū, manguru ka'icupūn taamcuru. 'una ucani taniara.
parū'una kaniarumi mataa rituka. muru'ū'ū rituka makasi, cucuruana
kaniarumi mamanūng! 'una makūkuang kava. ka'anū cu taamcuru
tavara'ū tia kasu pakūnnanu kumūnū. ka'anū makai iku. 'inmaamia tia
kipatusū manguru, ma'icupū tia tisa'un taamcuru.

tumatimana kaniarumi kari isi. masicucuru tumatuturu rituka misee.
noo aratupūku ku tina'an ia, vanai sii maraa ciuman ku. iimua sua
vucukū maku ia, ka'anū tavara'un takuciu muvūngū. noo kumakirikiri 'inia

ia, tia masarapū putuvūrukū cu. makasi pa! sua isis ia iku tamna
sakiri, 'akune'i tumatuturu cau cucumeni! marivari rituka makasi, tangria
kita tassa. matarava mamacai, tia ku manaturū muvūngū sakiri isi.

koo miaranau. tisa'ū taamcuru sua rituka. natia cu kūnūn sua rituka.
pacupūngūn rituka sua kaniarumi tamna sakiri. pasiūn kee taamcuru: “noo
mapucanū kasu 'ikua ia, tia ku tumatuturu kasua. tia pakūnnanu kamūnū sua
kaniarumi ”. pacupūngū taamcuru, tanamūn tumatimana makananu kari
rituka. takutavara'ū cu nguain 'unava kaniarumi makasia sakiri. mara'an
nikūnū cu kee sua campe masisakiri rituka! koo miaranau, matūnūsu cu
taamcuru mataa kaniarumi. makacang kaniarumi aratūkupū tina'an. nakai
nguain tamna mavuca'ū vucukū. ka'anū rangrang parapiciūn taamcuru.
nikūnū kee kavangvang kaniarumi tamna 'aramū. kisaa nguani tassa,
mastaan manūng tangria. vanai sii 'una tacini koo panaturū sakiri. makasu
niara'akia cu kavangvang ngisaa.

(文章大意 僅供參考) ※字數限 200 字

兔子、穿山甲與狐狸

森林有好多動物。有隻狐狸，動物都很懼怕牠，因為牠常常捕捉小動物來填飽肚子。狐狸渴望吃穿山甲的肉，但無計可施。穿山甲和兔子是好朋友，穿山甲告訴兔子，當我全身蜷起，只要搔我癢，我就會打開，你要保守秘密，千萬不能說出去！兔子表示，我們是好朋友，就是死也要為你保守秘密。

沒多久兔子被狐狸抓住，要被吃掉前，說出穿山甲的秘密，狐狸就把兔子吞到肚子，後來，狐狸也把穿山甲吃掉。兩位最要好的朋友，雙雙失去性命。